



續濟類編卷十一

明北海馮瑋

瑋集

弟馮瑗

楚黃門人周家棟校

淮南門人吳光義

政治類 五

仁政 一則

管仲入國篇 入國四句五行九惠之教一日老老
二曰慈幼三曰恤孤四曰養疾五曰合獨六曰問疾
七曰通窮八曰振困九曰接絕所謂老老者凡國都

皆有掌老年七十已上一子無征三月有饋肉八十已上二子無征月有饋肉九十已上盡家無征日有酒肉死上共棺槨勸子弟精膳食問所欲求所嗜此之謂老老所謂慈幼者凡國都皆有掌幼士民有子子有幼弱不勝養爲累者有三幼者無婦征四幼者盡家無征五幼又予之葆受二人之食能事而後止此之謂慈幼所謂恤孤者凡國都皆有掌孤士人死子孤幼無父母所養不能自生者屬之其鄉黨知識故人養一孤者一子無征養二孤者二子無征養三孤者盡家無征掌孤數行問之必知其食飲饑寒身

之勝勝而哀憐之此之謂恤孤所謂養疾者凡國都皆有掌養疾聾盲喑啞跛躄偏枯握遞不耐自生者上收而養之疾官而衣食之殊身而後止此之謂養疾所謂合獨者凡國都皆有掌媒丈夫無妻曰鰥婦人無夫曰寡取鰥寡而合和之予田宅而家室之三年然後事之此之謂合獨所謂問疾者凡國都皆有掌病士人有病者掌病以上令問之九十以上日一問八十以上二日一問七十以上三日一問衆庶五日一問疾甚者以告上身問之掌病行於國中以問病爲事此之謂問病所謂通窮者凡國都皆有通窮

若有窮夫婦無居處窮賓客絕糧食居其鄉黨以聞者有賞不以聞者有罰此之謂通窮所謂振困者歲凶庸人訾厲多死喪弛刑罰赦有罪散倉粟以食之此之謂振困所謂接絕者士民死上事死戰事使其知識故人受資於上而祠之此之謂接絕也

小惠

五則

附

桓公之平陵見家人有年老而自養者公問其故對曰吾有子九人家貧無以妻之吾使傭而未返也桓公取外御者五人妻之筦仲入諫曰公之施惠不亦小矣公曰何也對曰公待所見而施惠焉則齊國之有妻者少矣公曰若何筦仲曰令國丈夫二十而室女子十五而嫁

子路爲蒲令備水災與民春修溝瀆爲人煩苦故予人一簞食一壺漿孔子聞之使子貢復之子路忿然不悅往見夫子曰由也以暴雨將至恐有水災故與

人修溝瀆以備之而民多匱於食故予人一簞食一
壺漿而夫子使賜止之何也夫子止由之行仁也夫
子以仁教而禁其行仁也由也不受子曰爾以民爲
饑何不告於君發倉廩以給食之而以爾私饋之是
汝不明君之惠見汝之德義也速已則可矣否則爾
之受罪不久矣子路心服而退也

景差相鄭鄭人有冬涉水者出而脛寒後景差過之
下陪乘而載之覆以上衽晉叔向聞之曰景子爲人
國相豈不固哉子聞良吏居之三月而溝渠修十月
而津梁成六畜且不濡况於人乎

唐中宗遣使者分道詣江淮贖生中書舍人李乂上
疏諫曰江南鄉人承捕爲業魚鼈之利黎元所資雖
雲雨之私有霑於末類而生成之惠未洽於平人何
則江湖之饒生育無限府庫之用支供易殫費之若
少則所濟何成用之儻多則常支有闕在於拯物豈
若憂人且鬻生之徒唯利斯視錢刀日至網罟年滋
施之一朝營之百倍未若迴救贖之錢物減貧無之
徭賦活國愛人其福勝彼

僖宗時宰相有好施者常使人以布囊貯錢自隨行
施匄者每出襪褸盈路有朝士以書規之曰今百姓

疲弊寇盜充斥相公宜舉賢任能紀綱庶務捐不急之費杜私謁之門使萬物各得其所則家給人足自無貧者何必如此行小惠乎宰相大怒

公利三則

晉文公時翟人有封狐文豹之皮者文公喟然嘆曰封狐文豹何罪哉以其皮爲罪也大夫欒枝曰地廣而不平財聚而不散獨非狐豹之罪乎文公曰善哉說之欒枝曰地廣而不平人將平之財聚而不散人將爭之於是列地以分民散財以賑民

文公問政於舅犯舅犯對曰分熟不如分腥分腥不如分地割地以分民而益其爵祿是以上得地而民知富上失地而民知貧古之所謂致師而戰者其此之謂也

魯哀公問於仲尼曰吾欲小則守大則攻其道若何
仲尼曰若朝廷有禮上下有親民之衆皆君之畜也
君將誰攻若朝廷無禮上下無親民之衆皆君之讐
也君將誰與守於是廢澤梁之禁弛關市之征以爲
民惠也

政體 七則

齊明帝躬親細務綱目亦密於是郡縣及六署九府
常行職事莫不啓聞取決詔勅文武勳舊皆不歸選
部親近憑勢互相通進人君之務過繁密鍾嶸上書
言古者明君揆才頒政量能授職三公坐而論道九
卿作而成務天子唯恭已南面而已書奏明帝不懌
謂大中大夫顧嵩曰鍾嶸何人欲斷朕機務卿識之
不對曰嶸雖位末名卑而所言或有可采且繁碎職
事各有司存今人主總而親之是人主愈勞而人臣
愈逸所謂代庖人宰而爲大匠斲也明帝不顧而言

他

北齊肅宗識度沈敏少居臺閣明習吏事卽位尤自勤勵大革顯祖之弊時人服其明而譏其細嘗問舍人裴澤在外議論得失澤率爾對曰陛下聰明至公自可遠侔古昔而有識之士咸言傷細帝王之度頗爲未弘肅宗笑曰誠如卿言朕初臨萬幾慮不周悉故致爾耳此事安可久行恐後又嫌疎漏澤由是被寵遇庫狄顯安侍坐肅宗曰顯安我姑之子可言我之不逮顯安曰陛下太細天子乃更似吏肅宗曰朕甚知之然無法日久將整之以至無爲耳

陳主起自艱難知民疾苦性明察儉約每夜刺闥取外事分判者前後相續勅傳更籤於殿中者必投籤於階石之上令鎗然有聲曰吾雖眠亦令驚覺

柳彧見隋主勤於聽受百僚奏請多有煩碎上疏諫曰自古聖帝莫過唐虞然皆勞於求賢而佚於任使陛下留心治道無憚疲勞乃至營造細小之事出給輕微之物一川之內酬答百司日旰忘食夜分未寢動以文簿憂勞聖躬願察臣言少減煩務唯經國大事非臣下所能裁斷者奏請詳決自餘細務責成所司隋主嘉之曰柳彧真上國之寶也

唐太學生王循之上表乞假還鄉武太后許之狄仁傑曰臣聞君人者唯殺生之柄不假人自餘皆歸之有司故左右丞徒以下不拘左右相流以上乃判爲其漸貴故也彼學生求假丞簿事耳若天子爲之發勅則天下之事幾勅可盡乎必欲不違其願請普爲立制而已太后善之

憲宗嘗與宰相論自古帝王或勤勞庶政或垂拱無爲何爲而可杜黃裳曰王者上承天地宗廟下撫百姓四夷夙夜憂勤固不可自暇逸然上下有分紀綱有序苟慎選賢才而委任之有功則賞有罪則刑則

誰不盡力明主勞於求人而逸於任人此虞舜所以無爲而治者也至於簿書獄市煩細之事各有司存非人主所宜親也昔秦始皇以衡石程書魏明帝自按行尚書事隋文帝衛士傳餐皆無補當時取譏後世所務非其道也夫人主患不推誠人臣患不竭忠苟上疑其下下欺其上將以求理不亦難乎上深然之

後周世宗違衆議破北漢自是政事無大小皆親決百官受成於上而已河南府推官高錫上書諫以爲四海之廣萬機之衆雖堯舜不能獨治必擇人而任

之今陛下以身親之天下不謂陛下聰明睿智足以兼百官之任皆言陛下褊迫疑忌舉不信羣臣也不若選能知人公正者以爲宰相能愛民聽訟者以爲守令能豐財足食者使掌金穀能原情守法者使掌刑獄陛下但垂拱明堂視其功過而賞罰之天下何憂不治何必降君尊而代臣職屈貴位而親賤事無乃失爲政之本乎世宗不從

教化 二則

孔子爲魯大司寇有父子訟者夫子同狴執之三月不別其父請止夫子赦之焉季孫聞之不悅曰司寇欺予曩告子曰爲國家必先以孝予今戮一不孝以教民孝不亦可乎而又赦何哉冉有以告孔子夫子喟然歎曰嗚呼上失其道而殺其下非禮也不教以孝而聽其獄是殺不辜也三軍大敗不可斬也獄行不治不可刑也何者上教之不行罪不在民故也夫慢令謹誅賊也徵歛無時暴也不試責成虐也政無此三者然後刑可卽也書云義刑義殺勿庸以卽汝

心惟曰未有慎事言必教而後刑也故先王既陳之以道德上先服之而猶不可尚賢以勸之又不可卽廢之又不可而後以威憚之若是三年而百姓正矣其有邪民不從化者然後待之以刑則民咸知罪矣詩云尹氏大師維民之氏秉國之均四方之維天子是毘俾民不迷是以威厲而不試刑錯而不用今世則不然亂其教繁其刑使民迷惑而陷焉又從而制之故刑彌繁而盜不勝也三尺之岝而虛車不能登也百仞之山任負車登焉則陵遲故也數仞之墻而民不踰也百仞之山而豎子馮而游焉陵遲故也今世之陵遲亦久矣而能使民勿踰乎詩云周道如砥其直如矢君子所履小人所視眷焉顧之潛然出涕豈不哀哉詩曰瞻彼日月悠悠我思道之云遠曷云能來子曰伊稽首不其有來乎

孔子曰入其國其教可知也其爲人也溫柔敦厚詩教也疏通知遠書教也廣博易良樂教也潔淨精微易教也恭儉莊敬禮教也屬辭比事春秋教也故詩之失愚書之失誣樂之失奢易之失賊禮之失煩春秋之失亂其爲人也溫良敦厚而不愚則深於詩者矣疏通知遠而不誣則深於書者矣廣博易良而不

奢則深於樂者矣潔淨精微而不賊則深於易者矣
恭儉莊敬而不煩則深於禮者矣屬辭比事而不亂
則深於春秋者矣天有四時春夏秋冬風雨霜露無
非教也地載神氣吐納雷霆流行萬物露生無非教
也清明在躬志氣如神有物將至其兆必先是故聖
人之教與天地相參

禁令 十六則

管仲治國篇 凡爲國之急者必先禁末作文巧末
作文巧禁則民無所游食民無所游食則必農民事
農則田墾田墾則粟多粟多則國富國富者兵彊兵
彊者戰勝戰勝者地廣是以先王知衆民彊兵廣地
富國之必生於粟也故禁末作止竒巧而利農事今
爲末作竒巧者一日而作五日食農夫終歲之作不
足以自食也然則民舍本事而事末作舍本事而事
末作則田荒而國貧矣

法禁篇 擅國權以深索於民者聖王之禁也其身

毋任於上者聖王之禁也進則受祿於君退則藏祿於室毋事治職但力事屬私王官私君事去非其人而人私行者聖王之禁也修行則不以親爲本治事則不以官爲主舉毋能進毋功者聖王之禁也交人則以爲已賜舉人則以爲已勞仕人則與分其祿者聖王之禁也交於利通而獲於貧窮輕取於其民而重致於其君削上以附下枉法以求於民者聖王之禁也用不稱其人家富於其列其祿甚寡而資財甚多者聖王之禁也拂世以爲行非上以爲名常反上之法制以成羣於國者聖王之禁也飾於貧窮而發於勤勞權於貧賤身無職事家無常姓列上下之間議言爲民者聖王之禁也壺士以爲亡資修田以爲亡本則生之養私不死然後失矯以深與上爲市者聖王之禁也審飾小節以示民時言大事以動上遠交以踰群假爵以臨朝者聖王之禁也卑身襍處隱行辟倚側入迎遠遁上而遁民者聖王之禁也詭俗異禮大言法行難其所爲而高自錯者聖王之禁也守委閒居博分以致衆勤身遂行說人以貨財濟人以買譽其身甚靜而使人求者聖王之禁也行辟而堅言詭而辯術非而博順惡而澤者聖王之禁也以

朋黨爲友以蔽惡爲仁以數變爲知以重斂爲忠以
遂忿爲勇者聖王之禁也固國之本其身務歸於上
深附於諸侯者聖王之禁也

五輔篇

五經旣布然後逐姦民詰詐僞屏讒慝而

毋聽淫詞毋作淫巧若民有淫行邪性樹爲淫詞作
爲淫巧以上諂君上而下惑百姓移國動衆以害民
務者其刑死流凡人君之所以內失百姓外失諸侯
兵挫而地削名卑而國虧社稷滅覆身體危殆非生
於淫諂者未之嘗聞也何以知其然也淫聲諂耳淫
觀諂目耳目之所好諂心心之所好傷民民傷而國

不危者未之嘗聞也故明王之務在於彊本事去無
用然後民可使富今工以巧矣而民不足於備用者
其悅在玩好農以勞矣而天下饑者其悅在珍怪方
丈陳於前女以巧矣而天下寒者其悅在文繡是故
博帶梨大袂列文繡染刻鏤削雕琢采古之良工不
勞其知巧以爲玩好是故無用之物守法者不失
齊桓公好服紫一國盡服紫當是時也五素不得一
紫桓公患之謂管仲曰寡人好衣紫紫貴甚一國百
姓好服紫不已寡人奈何管仲曰君欲何不試勿衣
紫也謂左右曰吾甚惡紫之臭於是左右適有衣紫

而進者公必曰少遠吾惡紫臭公曰諾於是日郎中莫衣紫其明日國中莫衣紫三日境內莫衣紫也一曰齊王好紫衣齊人皆好也齊人五素不得一紫齊王患紫貴傳說王曰詩云不躬不親庶民不信今王欲民無紫衣者王以自解紫衣而朝羣臣有紫衣進者曰益遠寡人惡臭是日也郎中莫衣紫是月也國中莫衣紫是歲也境內莫衣紫

鄒君好服長纓左右皆服長纓甚貴鄒君患之問左右左右曰君好服百姓亦多服是以貴君因先自斷其纓而出國中皆不服長纓君不能下令爲百姓服度以禁之乃斷纓出以示民是先戮以涖民也

齊景公好婦人而丈夫飾者國人盡服之公使吏禁之曰女子而男子飾者裂其衣斷其帶裂衣斷帶相望而不止晏子見公曰寡人使吏禁女子而男子飾者裂其衣斷其帶相望而不止者何也對曰君使服之於內而禁之於外猶懸牛首於門而求買馬肉也公胡不使內勿服則外莫敢爲也公曰善使內勿服不旋月而國莫之服也

齊人甚好轂擊相犯以爲樂禁之不止晏子患之乃爲新車良馬出與人相犯也曰轂擊者不祥臣其祭

祀不順居處不敬乎下車棄而去之然後國人乃不為故曰禁之以制而身不先行也民不肯止故化其心莫若教也

韓非守道篇 明主之守禁也責育見侵於其所不能勝盜跖見害於其所不能取故能禁責育之所不能犯守盜跖之所不能取則暴者守愿邪者反正大男愿巨盜貞則天下公平而齊民之情正矣

魏文侯問李克曰刑罰之源安生李克曰生於姦邪淫佚之行凡姦邪之心饑寒而起淫佚者久饑之詭也雕文刻鏤害農事者也錦繡纂組傷女工者也農

事害則饑之本也女工傷則寒之原也饑寒並至而不能不為姦邪者未之有也男女飾美以相矜而能無淫佚者未嘗有也故上不禁技巧則國貧民侈國貧窮者為姦邪而富足者為淫佚則驅民而為邪也民以為邪因以法隨誅之不赦其罪則是為民設陷也刑罰之起有原人主不塞其本而替其末傷國之道乎文侯曰善以為法服也

劉向修文篇 古者必有命民命民能敬長憐孤取舍好讓居事力者命於其君命然後得乘飭輿駢馬未得命者不得乘乘者皆有罰故其民雖有餘財侈

物而無仁義功德則無所用其餘財侈物故其民皆興仁義而賤財利賤財利則不爭不爭則強不凌弱衆不暴寡是唐虞所以興象刑而民莫敢犯法而亂斯止矣詩云告爾民人謹爾侯度用戒不虞此之謂也

漢王符浮侈篇 王者以四海爲家兆人爲子一夫不耕天下受其饑一婦不織天下受其寒今舉俗舍本農趨商賈牛馬車輿填塞道路游手爲巧充盈都邑務本者少浮食者衆商邑翼翼四方是極今察洛陽資末業者什於農夫虛僞游手者什於末業則一

夫耕百人食之一婦桑百人衣之以一奉百孰能供之天下百郡千縣市邑萬數類皆如此本末不足相供則民安得不饑寒饑寒並至則民安能無姦軌姦軌繁多則吏安能無嚴酷嚴酷數加則下安能無愁怨愁怨者多則咎徵並臻下民無聊而上天降災則國危矣夫貧生於富弱生於彊亂生於化危生於安是故明主之養民憂之勞之教之誨之慎微防萌以斷其邪故易美節以制度不傷財不害民七月之詩大小教之終而復始由此觀之人固不可恣也今人奢衣服侈飲食事口舌而習調欺或以謀姦合任爲

業或以游博持掩爲事丁夫不扶犁鋤而懷丸挾彈
携手上山遨遊或好取土作丸賣之外不足禦寇盜
內不足禁鼠雀或作泥車瓦狗諸戲弄之具以巧詐
小兒此皆無益也詩刺不績其麻市也娑娑又婦人
不修中饋休其蠶織而起學巫祝鼓舞事神以欺誣
細民熒惑百姓妻女羸弱疾病之家懷憂憤憤易爲
恐懼至使奔走便時去離正宅崎嶇路側風寒所傷
姦人所利盜賊所中或增禍重崇至於死亡而不知
巫所欺誤反恨事神之晚此妖妄之甚者也或刻畫
好繪以書祝亂或虛飾巧言希致福祚或糜折金絲
令廣分寸或斷截衆縷繞帶手腕或裁切綺縠縫紵
成幡皆單費百縑用功千倍破牢爲僞以易就難坐
食嘉穀消損白日夫山林不能給野火江海不能實
漏卮皆所宜禁也昔孝文皇帝躬衣弋綈革舄韋帶
而今京師貴戚衣服飲食車輿廬第奢過王制固亦
甚矣且其徒御僕妾皆服文組綵牒錦繡綺紈葛子
升越箛中女布犀象珠玉虎冕瑋琚石山隱飾金銀
錯鏤窮極麗美轉相誇詫其嫁娶者車駢數里緹帷
竟道騎奴侍童夾轂並引富者競欲相過貧者耻其
不逮一饗之所費破終身之業古者必有命然後乃

得衣繒絲而乘車馬今雖不能復古宜令細民略用
孝文之制古之葬者厚衣之以薪葬之中野不封不
樹喪期無數後世聖人易之以棺槨桐木爲棺葛采
爲緘下不及泉上不泄臭中世以後轉用楸梓槐柏
柁樗之屬各因方士裁用膠漆使其堅足恃其用足
任如此而已今者京師貴戚必欲江南樗梓豫章之
木邊遠下土亦競相放效夫樗梓豫章所出殊遠伐
之高山引之窮谷入海乘淮逆河泝洛工匠雕刻連
累日月會衆而後動多牛而後致重且千勛功將萬
而東至樂浪西達敦煌費力傷農於萬里之地古

者墓而不墳中世墳而不崇仲尼喪母冢高四尺遇
雨而崩弟子請修之夫子泣曰古不修墓及鯉也死
有棺無槨文帝葬芷陽明帝葬洛陽皆不藏珠寶不
起山陵墓雖卑而德最高今京師貴戚郡縣豪家生
不極養死乃崇喪或至金縷玉匣樗梓梗柈多埋珍
寶偶人車馬造起大冢廣種松柏廬舍祠堂務崇華
侈案部畢之陵南城之冢周公非不忠曾子非不孝
以爲褒君愛父不在於聚財揚名顯親無取於車馬
昔晉靈公多賦以雕墻春秋以爲不君華元樂舉厚
葬文公君子以爲不臣况於羣司士庶乃可僭侈主

上過天道乎

唐明皇以風俗奢靡制乘輿服御金銀器玩宜令有司銷毀以供軍國之用其珠玉錦繡焚於殿前后妃以下皆毋得服珠玉錦繡勅百官所服帶及酒器馬銜鐙三品以上聽飾以玉四品以金五品以銀自餘皆禁之婦人服飾從其夫子其舊成錦繡聽染爲阜自今天下更毋得采珠玉織錦繡等物違者杖一百工人減一等罷兩京織錦坊 司馬光曰明皇始欲爲治能自刻厲節儉如此晚節猶以奢敗甚哉奢靡之易以溺人也詩云靡不有初鮮克有終可不慎哉

宋錢彥遠敦儉篇 聞享四海之奉者文采藩飾備味極盛勢適當然豈過自刻損稱爲儉德蓋去泰甚屏奢侈之爲儉爾一人儉則百官儉百官儉則庶民耻費敦朴浮囂輕僞無所售利農夫工女完固充給我太祖太宗知稼穡艱難奉養清約裁冗貶侈今郊廟大禮陳國初器械車服堅樸素質至甚餘可追驗矣先帝雖据太平全盛之實然儉節聖躬嘗見內直黃門給錦衾命紫裯代幸西京時嬪御食品准從駕羣臣天禧間欲禁塗金飾下詔自乘輿始朞月遠邇杜絕化之之誠耆老於今稱道陛下嗣位音樂宮室

車馬無所加近歲差踰前臣踈遠不悉時事但聞調
諸官署財物爲玩好頗衆北門內作工雕鏤鎔冶刻
削幾千人復以大官調絮麓略就近署私立養爨後
苑置酒府醞釀共燕昵之須宮中發取市物百費震
動掖廷親戚亟齒班列佩印綬給侍禁省是數者皆
無益睿明臣料此誠左右佞諂惑天聰納諫切厲兢
兢畏天下過已始相與迎惡先意隱屏爲此快一時
欲圖少頃兌說賜予放宕流溢源發有漸殊不知暴
於外則愈損美德謹按禮王者皮弁以食重身防微
故有和食醫嘗食監失饒瘠職則刑而別庖所薦異

內羞正饌旋取區肆間或非時珍怪不問從出入
時禁止小使三數人庀其事陛下安自輕御馬奈
廟社稷何臣之深憂也且京師四方回首易聽取爲
表式今縱未大失風俗已溢經曰上好是下必有甚
者臣視貴臣家悉相耀以技巧聲色狗馬或竊畜尚
方器物起屋室跨通衢大路富商豪族歆慕結納貨
賂上流緣而民益貧游手益衆猾細乘作淫巧日變
月新營媚富貴耳目且利今智昏盛令心驕昏則慮
不精驕則所惜重元僚邇臣安危所託使昏且驕後
何望邪昔秦王責范曄以楚鐵劔利優倡拙吾恐其

圖秦夫倡優巧拙小節也古人用規勝負况奢儉乎使天下聞之可也四夷聞之不可也臣嘗行都下見先朝宰相若呂端李沆舊第存焉窮辟痺陋今公卿隸人所舍或加之蓋當時法令肅而習尚正也故衣弋綈焚雉頭裘是廼帝王末事前史皆書之者顧治亂所繫迺深美絕稱聳示後世陛下宜醇法列聖成績歷考三代所以得失凡違典章舊制者亟罷揭還有司抑減內寵之勢其父子兄弟纔賜衣食不命以要官劇職諸郡國織靡輕綃之服止其歲輸雕纂竒撤藏有金銀飾者出付度支助軍費皇皇然

穆穆然用天子禮以自澹樂而有節儉不偏下使知聖人之心垂精勤勞興亡之際羣下率化庶耻張立萬有恃榮河近遂惡未悛者嚴刑刑之假一勸百所舉雖尊俎俯仰而所濟遠矣

石介明禁篇 夫國家之禁疎密不得其中矣今山

澤江海皆有禁鹽鐵酒茗皆有禁布綿絲枲皆有禁關市河梁皆有禁子去其父則不禁民去其君則不禁男去耒耜則不禁女去織紵則不禁工作奇巧則不禁商通珠貝則不禁士亡仁義則不禁左法亂俗則不禁淫文害正則不禁市有游手則不禁官有游

食則不禁衣服踰制則不禁宮室過度則不禁豪強
兼并則不禁權要橫暴則不禁賄行於上則不禁吏
貪於下則不禁夫子去其父則亂也民去其君則叛
也男去耒耜女去織紝則離其業也工作竒巧商通
珠具士亡仁義則棄其本也左法亂俗則中華夷也
淫文害正則經籍息也士有游手官有游食則公私
墮也衣服踰制宮室過度則上下僭也豪強兼并權
要橫暴則貧人困也賄行於上吏貪於下則公道闕
也如是而不禁彼出澤江海人所取財也鹽鐵酒茗
人所資也布綿絲枲人所取用也關市河梁人所取
濟也而禁豈先王之法乎三代之制乎哉或曰如何
則先王之法也三代之制也曰惟禁其不禁而弛其
禁則先王之法也三代之制也

蘇軾重巽以申命論

昔聖人之始畫卦也皆有以

配乎物者也巽之配於風者以其發而有所動也配
於木者以其仁且順也夫發而有所動者不仁則不
可以久不順則不可以行故發而仁動而順而巽之
道備矣聖人以爲不重則不可以變故因而重之使
之動而能變變而不窮故曰重巽以申命言天子之
號令如此而後可也天地之化育有可以指而言者

有不可以求而得之者今夫日皆知其所以爲煖雨
皆知其所以爲潤雷霆皆知其所以爲震霜雪皆知
其所以爲殺至爲風悠然布於天地之間來不知其
所自去不知其所入噓而炎吹而冷大而鼓乎太山
喬嶽之上細而入乎窾室蔀屋之下發達萬物而天
下不以爲德摧拔草木而天下不以爲怒故曰天地
之化育有不可求而得者此聖人之所法以令天下
之術也聖人在上天下之民各得其職士者皆曰吾
學而仕農者皆曰吾耕而食工者皆曰吾作而用賈
者皆曰吾負而販不知聖人之制命令以鼓舞通變
其道而使之安乎此也聖人之在上也天下可由而
不可知可言而不可議蓋得乎巽之道也易者聖人
之動而卦者動之時也蠱之彖曰先甲三日後甲三
日而巽之九五亦曰先庚三日後庚三日而說者謂
甲庚皆所以申命而先後者慎之至也聖人憫斯民
之愚而不忍使之遽陷於罪戾也故先三日而令之
後三日而申之不從而後誅蓋其用心之慎也以至
神之化令天下使天下不測其端以至詳之法曉天
下使天下明知其所避天下不測其端而明知其所
避故靡然相率而不敢議也上令而下不議下從而

上不誅順之至也故重巽之道上下順也

蔡襄福州五戒 觀今之俗爲父母者視已之子猶有厚薄迨至娶婦多令異食貧者困於日給其勢不得不然富者亦何爲之蓋父母之心不能均於諸子以此不可不戒 人子之孝本於養親以順其志死生不違於禮是孝誠之至也觀今之俗貧富之家多於父母異則兄弟分養乃至纖悉無有不校及其亡也破產賣宅以爲酒肴設勞親知施與浮圖以求冥福原其爲心不在於親將以誇勝於人是不知爲孝之本也生則盡養死不妄費如此豈不善乎 兄

弟之愛出於天性少小相從其心懽忻豈有間哉迨因娶婦或至臨財憎惡一開卽成怨隙至有興訴訟冒刑獄至死而不息者殊可哀也蓋由聽婦言貪財利絕同胞之恩友愛之情遂及於此 娶婦何謂欲以傳嗣豈爲財也觀今之俗娶其妻不顧門戶直求資財隨其貧富未有婚姻之家不爲怨怒原其由蓋婚禮之夕廣糜費已而校奩橐朝索其一暮索其二夫虐其妻求之不已若不滿意至有鬻男女之愛輒相棄背習俗日久不以爲怪此生民之大弊人行最惡者也 凡人情莫不欲富至於農人商賈百工之

家莫不晝夜營度以求其利然農人兼并商賈欺謾
大率刻剝貧民罔昧神理譬如百蟲聚其强者食啗
曾不暫息求而得之廣爲施與冀滅罪惡其愚甚矣
今欲爲福孰若減刻剝之心以寬貧民去欺謾之行
以畏神理爲子孫之計則亦久遠居鄉黨之間則爲
良善其義至明不可不志

風俗八則

劉安齊俗訓 易曰履霜堅冰至聖人之見終始微
言故糟丘生乎象楛炮烙生乎熱升子路撻溺而受
牛謝孔子曰魯國必好救人於患子贛贖人而不受
金於府孔子曰魯國不復贖人矣子路受而勸德子
贛讓而止善孔子之明以小知大以近知遠通於論
者也由此觀之庶有所在而不可公行也故行齊於
俗可隨也事周於能易爲也矜僞以惑世伉行以違
衆聖人不以爲民俗廣廈濶屋連闔通房人之所安
也鳥入之而憂高山險阻深林叢薄虎豹之所樂也

人入之而畏川谷通原積水重泉龜鼉之所便也人入之而死咸池承雲九韶六英人之所樂也鳥獸聞之而驚深谿峭岍峻木尋枝猿狖之所樂也人上之而慄形殊性詭所以爲樂者乃所以爲哀所以爲安者乃所以爲危也乃至天地之所覆載日月之所照認使各便其性安其居處其宜爲其能故愚者有所修智者有所不足柱不可以摘齒筐不可以持屋馬不可以服重牛不可以追速鈇不可以爲刀銅不可以爲弩鐵不可以爲舟木不可以爲釜各用之於其所適施之於其所宜卽萬物一齊而無由相過夫明鏡便於照形其於以函食不如簞犧牛粹毛宜於廟牲其於以致雨不若黑蜩由此觀之物無貴賤因其所貴而貴之物無不貴也因其所賤而賤之物無不賤也夫玉璞不厭厚角觶不厭薄漆不厭黑粉不厭白此四者相反也所急則均其用一也今之表與蓑孰急見雨則表不用升堂則蓑不御此代爲常者也譬若舟車楯肆窮廬故有所宜也故老子曰不上賢者言不致魚於木沉鳥於淵 亂國若盛治國若虛亡國若不足存國若有餘虛者非無人也皆守其職也盛者非多人也皆徼於末也有餘者非多財也欲

節事寡也不足者非無貨也民躁而費多也 羗氏

燹翟嬰兒生皆同聲及其長也雖重象狄騃不能通

其言教俗殊也今三月嬰兒生而徙國則不能知其

故俗由此觀之衣服禮俗者非人之性也所受於外

也夫竹之性浮殘以爲牒束而投之水則沉失其體

也金之性沉託之於舟上則浮勢有所支也夫素之

質白染之以涅則黑縑之性黃染之以丹則赤人之

性無邪久湛於俗則易易而忘本合於若性故日月

欲明浮雲蓋之河水欲清沙石濺之人性欲平嗜欲

害之惟聖人能遺物而反已夫乘舟而惑者不知東

西是斗極則寤矣夫性亦人之斗極也 凡將舉

必先平意清神清意平物乃可正若壘之抑填正

與之正傾與之傾 故水擊則波興氣亂則智昏智

昏不可以爲政波興不可以爲平 強哭者雖病不

哀強親者雖笑不和情發於中而聲應於外故釐負

羈之壺餐愈於晉獻公之垂棘趙宣孟之束脯賢於

智伯之大鐘 古者非不知繁升降槃還之禮也牒

采齊肆夏之容也以爲曠日煩民而無所用故制禮

足以佐實諭意而已矣古者非不能陳鐘鼓盛筦簫

揚干戚奮羽旄以爲費財亂政制樂足以合歡宣意

而已喜不羨於音非不能竭國糜民虛府殫財含珠
鱗施綸組節束追送死也以爲窮民絕業而無益於
槁骨腐肉也故葬堊足以收歛蓋藏而已昔舜葬蒼
梧市不變其肆禹葬會稽之山農不易其畝明乎死
生之分通乎侈儉之適者也亂國則不然言與行相
悖情與貌相反禮節以煩樂優以淫崇死以害生久
喪以招行是以風俗濁於世而誹譽萌於朝是故聖
人廢而不用也義者循理而行宜也禮者體情制文
者也義者宜也禮者體也昔有扈氏爲義而亡知義
而不知宜也魯治禮而削知禮而不知體也 夫以

一世之變欲以耦化應時譬猶冬被葛而夏被裘
一儀不可以百發一衣不可以出歲儀必應乎高下
衣必適乎寒暑是故世異則事變時移則俗易故聖
人論世而立法隨時而舉事尚古之王封於泰山禪
於梁父七十餘聖法度不同非務相反也時世異也
是故不法其已成之法而法其所以爲法所以爲法
者與化推移者也 今夫爲平者準也爲直者繩也
若夫不在於繩準之中可以平直者此不共之術也
故叩宮而宮應彈角而角動此同音之相應也其於
五音無所比而二十五絃皆應此不傳之道也故蕭

條者形之君而寂漠者音之主也 道德之論譬猶
日月也江南河北不能易其指馳騫千里不能易其
處趨舍禮俗猶室宅之居也東家謂之西家西家謂
之東家雖臯陶爲之理不能定其處 治國之道上
無苛令官無煩治士無僞行工無淫巧其事經而不
擾其器完不飾亂世則不然爲行者相揭以高爲禮
者相矜以僞車輿極於雕琢器用逐於刻鏤求貨者
爭難得以爲寶詆文者處煩撓以爲慧爭爲佞辨久
積而不訣無益於治工爲奇器歷歲而後成不周於
用故神農之法曰丈夫丁壯而不耕天下有受其饑
者婦人當年而不織天下有受其寒者故身自耕
親織以爲天下先其導民也不貴難得之貨不器無
用之物是故其耕不強者無以養生其織不強者無
以揜形有餘不足各歸其身衣食饒溢姦邪不生安
樂無事而天下均平故孔丘曾參無所施其善孟賁
成荆無所行其威衰世之俗以其知巧詐僞飾衆無
用貴遠方之貨珍難得之財不積於養生之具澆天
下之淳析天下之樸犴服馬牛以爲牢滑亂萬民以
清爲濁性命飛揚皆亂以營貞信漫瀾人失其情性
於是乃有翡翠犀象黼黻文章以亂其目芻豢黍粱

荆吳芬馨以噍其口鐘鼓管簫絲竹金石以淫其耳
趨舍行義禮節謗議以營其心於是百姓糜沸豪亂
暮行逐利煩挈澆淺法與義相非行與利相反雖十
管仲弗能治也且富人則車輿衣纂錦馬飾傳旄象
帷幕茵席綺繡條組青黃相錯不可爲象貧人則夏
被褐帶索哈菽飲水以充腸以支暑熱冬則羊裘解
札短褐不掩形而煬竈口故其爲編戶齊民無以異
然貧富之相去也猶人君與僕虜不足以論之夫乘
奇技僞邪施者自足乎一世之間守正修理不苟得
者不免乎饑寒之患而欲民之去末反本由是發其
原而壅其流也夫雕琢刻鏤傷農事者也錦繡纂
害女工者也農事廢女工傷則饑之本而寒之原也
夫饑寒並至能不犯法干誅者古今之未聞也夫
民有餘卽讓不足則爭讓則禮義生爭則暴亂起扣
門求水莫弗與者所饒足也林中不賣薪湖上不鬻
魚所有餘也故物豐則欲省求贍則爭止秦王之時
或人薤子利不足也劉氏持政獨夫收孤財有餘也
故世治則小人守政而利不能誘也世亂則君子爲
姦而法弗能禁也

賈誼時變篇 秦國失理天下大敗衆拚寡知欺愚

勇劫懦壯凌衰攻擊奮者爲賢貴人善突盜者爲圻
諸侯設諂而相飭設輟而相紹者爲知天下亂至矣
是以大賢起之威振海內德從天下曩之爲秦者今
轉而爲漢矣今者何如進取之時去矣并兼之勢過
矣胡以孝弟循順爲善書而爲吏耳胡以行義禮節
爲家富而出官耳驕耻偏而爲祭尊黥劓者攘臂而
爲祭政行爲狗彘也苟家富財足隱機吁視爾爲天
子耳唯告罪昆弟欺突伯父逆於父母乎然錢財多
也衣服循也我何妨爲世之基公唯愛季毋妻公之
接女乎車馬嚴也走犬良也矯誣而家美盜賊而財
多何傷欲交吾擇貴寵者而交之欲勢擇吏權者而
使之取婦嫁子非有權勢吾不與婚姻非有貴戚不
與兄弟非富大家不與出入因何也今俗侈靡以出
相驕出倫踰等以富過其事相競今世貴空爵而賤
良俗靡而尊姦富民不爲姦而貧爲里毋罵廉吏釋
官而歸爲邑笑居官敢行姦而富爲賢吏家處者犯
法爲利爲材士故兄勸其弟父勸其子則俗之邪至
於此矣商君違禮義棄倫理并心於進取行之三歲
秦俗日敗秦人有子家富子壯則出分家貧子壯則
出贅假父耨鉏杖耒而慮有德色毋取瓢椀箕箒慮

立而訊語抱哺其子與公併踞婦姑不相說則反脣而睨其慈子嗜利而輕簡父母也念罪非有倫理也其不同禽獸僅焉耳然并心而赴時猶曰廢六國兼天下功成求得矣終不知反廉耻之節仁義之厚信并兼之法遂進取之業凡十三歲而社稷爲墟不知守成之數得失之術也悲夫

瑰瑋篇

天下有瑰政於此予民而民愈貧衣民而

民愈寒使民樂而民愈苦使民知而愈不知避縣網甚可瑰也今有瑋術於此奪民而民益富不衣民而民益煖苦民而民益樂使民愈愚而民愈知不

懼縣網陛下無意少聽其數與夫雕文刻鏤周用之物繁多纖微苦窳之器日變而起民棄完堅之物而務雕鏤纖巧以相競高作之宜一日今十日不輕能成用一歲今半歲而弊作之費日挾巧用之易弊不耕而多食農人之食是天下之所以困貧而不足也故以末予民民大貧以本予民民大富黼黻文繡纂組害女工且夫百人作之不能衣一人方且萬里不輕能具天下之力勢安得不寒世之俗侈相耀人慕其所不如悚迫於俗願其所未至以相競高而上非有制度也今雖刑餘鬻妾下賤衣服得過諸侯擬天

子是使天下公得冒主而使人務侈也冒主務侈則天下寒而衣食不足矣故以文繡衣民而民愈寒以布帛被民民必煖而有布帛之饒矣夫竒巧末技商販游食之民形佚樂而心縣愆志苟得而行淫侈則用不足而蓄積少矣卽遇凶旱必先困窮迫身則苦饑甚焉今毆民而歸之農皆着於本則天下各食於力末技游食之民轉而緣南畝則民安性勸業而無縣愆之心無苟得之志行恭儉蓄積而人樂其所矣故曰苦民而民益樂也世淫侈矣飾知巧以相詐利者爲知士敢犯法禁昧大姦者爲識理故邪人務而日起姦詐繁而不可止罪人積下衆多而無時已君臣相冒上下無辨此生於無制度也今去淫侈之俗行節儉之術使車輿有度衣服器械各有制數制數已定故君臣絕尤而上下分明矣擅退則讓上僭者誅故淫侈不得生知巧詐謀無爲起姦邪盜賊自爲止則民離罪遠矣知巧詐謀不起所謂愚故曰使民愚而民愈知不罹縣網此四者使君臣相冒上下無別天下困貧姦詐盜賊並起罪人蓄積無已者也故不可不急速救也

朱穆崇厚論 夫俗之薄也有自來矣故仲尼嘆曰

大道之行也而丘不與焉蓋傷之也夫道者以天下
爲一在彼猶在己也故行違於道則愧生於心非畏
義也事違於理則負結於意非憚禮也故率性而行
謂之道得其天性謂之德德性失然後貴仁義是以
仁義起而道德遷禮法興而淳樸散故道德以仁義
爲薄淳樸以禮法爲賊也夫中世之所敦已爲上世
之所薄况又薄於此乎故夫天不崇大則覆幬不廣
地不深厚則載物不博人不敦龐則道數不遠昔在
仲尼不失舊於原壤楚嚴不忍章於絕纓由此觀之
聖賢之德敦矣老氏之經曰大丈夫處其厚不處其
薄居其實不居其華故去彼取此夫時有薄而厚於
行有失而惠用故覆人之過者敦之道也救人之失
者厚之行也往者馬援深昭此道可以爲德誠其兄
子白吾欲汝曹聞人之過如聞父母之名耳可得聞
口不可得言斯言要矣遠則聖賢履之上世近則邴
吉張子孺行之漢廷故能振英聲於百世播不滅之
遺風不亦美哉然而時俗或異風化不敦而尚相誹
謗謂之臧否記短則兼折其長貶惡則并伐其善悠
悠者皆是其可稱乎凡此之類豈徒乖爲君子之道
哉將有危身累家之禍焉悲夫行之者不知憂其然

故害與而莫之及也斯既然矣又有異焉人皆見之而不能自遷何則務進者趨前而不顧後榮貴者矜已而不待人智不接愚富不賑貧貞士孤而不恤賢者危而不存故田蚡以尊顯致安國之金淳于以貴勢引方進之言夫以韓翟之操爲漢之名字然猶不振一貧賢薦一孤士又况其下者乎此禽息史魚所以專名於前而莫繼於後者也故時俗敦美則小人守正利不能誘也時否俗薄雖君子爲邪義不能止也何則先進者既往而不返後來者復習俗而追之是以虛華盛而忠信微刻薄稠而純篤稀斯蓋谷風有棄予之歎伐木有鳥鳴之悲矣嗟乎世士誠躬孔聖之崇則嘉楚嚴之美行希李老之雅誨思馬援之所尚鄙二宰之失度美韓稜之抗正貴邴張之弘裕賤時俗之誹謗則道豐績盛名顯身榮載不刊之德播不滅之聲然知薄者之不足厚者之有餘也彼與草木俱朽此與金石相傾豈得同年而語並日而談哉

晉庾峻爲侍中是時風俗趣競禮讓凌遲峻上疏臣聞黎庶之性人衆而賢寡設官分職則官寡而賢衆爲賢衆而多官則妨化以無官而棄賢則廢道是

故聖王之御世也。因人之性或出或處，故有朝廷之士。又有山林之士。朝廷之士，佐主成化，猶人之有股肱心膂，共爲一體也。山林之士，被褐懷玉，太上栖于丘園，高節出于衆庶。其次輕爵服，遠耻辱，以全志。最下就列位，唯無功而能知止。彼其清劬，足以抑貪污。退讓足以息鄙事。故在朝之士，聞其風而悅之。將受爵者，皆耻躬之不逮。斯山林之士避寵之臣，所以爲美也。先王嘉之節，雖離世而德合於主。行雖詭朝而功同於政。故大者有玉帛之命，其次有凡杖之禮。以厚德載物，出處有地。旣廊廟多賢才，而野人亦不失

爲君子。此先王之弘也。秦塞斯路，利出一官，唯有處士之名，而無爵列于朝者。商君謂之六蜴，韓非謂之五蠹。時不知德，惟爵是聞。故閭閻以公乘侮其鄉人，郎中以上爵傲其父兄。漢祖反之，大暢斯否。任蕭曹以天下重，囚皓於南山。以張良之勳，而班在叔孫之後。蓋公之賤，而曹相諮之以政。帝王貴德於上，俗亦反本於下。故田叔等十人，漢廷臣無能出其右者。而未嘗干祿於時，以釋之之貴，結王生之襪於朝。而其名愈重。自非主臣尚德，兼愛孰能通天下之志如此。其大者乎。夫不革百王之弊，徒務救世之政，文士競

智而務入武夫恃力而爭先功高矣而意未滿功報
矣其求不已又國無隨才任官之制俗無難進易退
之耻位一高雖無功而不見下已負敗而後見用故
因前而升則處士之路塞矣又仕者黜陟無章是以
普天之下先競而後讓舉世之士有進而無退大人
溺於動俗執政撓於羣言衡石爲之失平清濁安可
復分昔者先王患向之所以取天下者今之爲弊是
故功成必改其物業定必易其教雖以爵祿使下臣
無貪陵之行雖以甲兵定功主無窮武之悔臣愚以
爲古者大夫七十懸車今自非元功國老三司上才

可聽七十致仕則士無懷祿之嫌矣其父母八十可
聽終養則孝莫大於事親矣吏歷試無績依古終身
不仕則官無秕政矣能小而不能大可降還涖小則
使人以器矣人主進人以禮退人以禮人臣亦量能
受爵矣其有孝如王陽臨九折而去官潔如貢禹冠
一免而不著及知止如王孫知足如疏廣雖去列位
而居東野與人父言依於慈與人子言依於孝此其
出言合於國檢危行彰於本朝去勢如脫屣路人爲
之隕涕辭寵如金石庸夫爲之興行是故先王許之
而聖人貴之夫人之性陵上猶水之趣下也益而不

已必決升而不已必困始於匹夫行義不敦終於皇
輿爲之敗績固不可不慎也下人并心進趣上宜以
退讓去其甚者退讓不可以刑罰使莫若聽朝士時
時從志山林往往間出無使入者不能復出往者不
能復返然後出處交泰提衡而立時靡有爭天下可
得而化矣

宋文帝性仁厚恭儉勤於爲政守法而不峻容物而
不弛百官皆久於其職守宰以六暮爲斷吏不苟免
民有所係三十年間四境之內晏安無事戶口蕃息
出租供徭止於歲賦晨出暮歸自事而已閭閻之內
誦相聞士敦操尚鄉耻輕薄江左風俗於斯爲美
似之言政治者皆稱元嘉焉

唐高宗時吐蕃遣其大臣仲琮入貢上問以吐蕃風
俗對曰吐蕃地薄氣寒風俗樸魯然法令嚴整上下
一心議事常自下而起因人所利而行之斯所以能
持久也

宋唐庚憫俗論 自古諸侯風俗大小曷嘗不與其
國相稱齊地負海膏壤二千里則其俗濶達寬緩而
多智全晉未分時在春秋世最爲強國則其俗用意
深遠有古帝王之遺風鄒魯居洙泗之間迫於齊楚

國小而地狹則其俗亦復齷齪而謹畏今天下大矣堯舜三代之地蓋不至於此民生其間耳之所聞目之所睹體之所安者壯矣而風俗之大不足以稱之有是理否風俗非一事要以人材爲本今士大夫達時變識事情警敏有餘矣至於學治道通大體氣力度量足以支久而任重者未可多得是豈無有也有則不容於時今之建言也類皆薄物細故非天下所以治亂安危而士之所言亦不過趣一切辦治而已非能有益於宗廟社稷也學術小故無大論議力量狹故無大功名以爲上世悉然則前此風俗嘗廣矣當是之時唯恐其疏爾形勢非有不同年表日曆非甚相遠而更病其隘是必有說矣吾聞江海之水必有吞舟之魚通邑大都必有千金之家以四方萬里之國而非得恢廓宏遠之風以充之是猶衣九尺之衣束十圍之帶高視濶步而血氣不逾中人也可乎建武永平之治未必優於西京而風俗不及者正其小也傳曰不知其形視其影也今百工之所造商賈之所鬻士女之所服者日益狹陋而一時人物大率悍而短小此非其影耶古之化俗惡者可使爲善邪者可使爲正今俗非有他也獨患小爾顧不可使之

大乎

北	水	火	土	金	木	水	火	土	金	木
...



